

摘藻堂四庫全書薈要

集部

欽定四庫全書薈要

集部

空同集卷二十一

二十一



詳校官候補通政司經歷臣郭祚熾

欽定四庫全書蒼要卷一萬六千九百十一

集部

空同集卷二十

明 李夢陽 撰

七言古三

送何舍人齋詔南紀諸鎮

先皇乘龍去不返悲風慘淡吹宸極四海哭若喪慈母  
百官狂走天為黑憶昨臨危坐御牀手挈神器歸今皇  
密語丁寧肺腑裂三老親聞眼流血金滕立剖石室秘

此事難從外人說我君謙讓不可得割哀踐阼弘祖烈  
日月重懸萬國朝雷雨赦過羣方悅越南海北霹靂動  
蠻夷盡奉王正月此時九道使臣出舍人亦輟螭頭筆  
白馬朝騰薊北雲錦帆暮閃江沱日江沱秋交多烈風  
洞庭雲夢俱眼空巴陵縣令舍人兄接詔會弟西樓中  
童年題詩在高壁六載不到紗為籠南嶽以南惟峻山  
苦蒸毒霧何盤盤天王新令雷電掣妖蛇不敢啼林端  
五溪官長喘喙拜黔州父老垂淚看却瞻蒼梧雲氣黑

斑竹臨江怨幽色翠華縹緲空冥間此時此恨誰知得  
君不見馬援柱孔明碑剝落黃蒿裏千年莓苔待君洗  
萬里之行自此始歸來何以獻天子

上元訪杜鍊師

宣皇昔時乘八風御龍遊戲行烟空馬前兩兩侍玉女  
別館多在蓬萊宮朝天宮中舊時殿樓臺晝鎖無人見  
琉璃井塌青苔滿松柏森森月如練嗚呼往事難具陳  
燈火如山又一春北斗壇西訪隱淪我師黃衫白纒巾

坐我更致西樓賓玉杯  
漱灑赤瑪瑙織罽四角銀麒麟  
酒肉山堆滿堂醉仙厨  
往往來八珍孝宗之朝五真人  
師也磊落當其倫自言召見親  
賜食曾把丹書獻紫宸  
如今寂寞看春色銀魚玉帶無  
消息豈惟魚帶無消息  
欲語吞聲淚沾臆勸師對此莫  
酸辛世間萬事如轉輪  
且將芝草供生計聊與烟霞作  
主人月徧彩雲當牖生  
旋呼兩童吹玉笙聞師妙得逡  
巡術百壺倒盡還須傾  
古來仙子向誰在飲者翻垂千  
載名名垂千載亦區區

酒闌燈昏夜復徂不見秦陵草已宿春生樹啼雙老鳥  
此時亦應羣帝趨金燈翠旗光有無

奉送大司馬劉公歸東山草堂歌

東山有草堂縹緲雲嶠孤前對祝融峯下瞰巴陵湖明  
公昔時此堂居麋鹿熊豕當窗趨洞庭日落風浪湧倒  
影射堂堂欲動慘淡誰聞紫芝曲獨善不救蒼生哭先  
帝親裁五色詔老臣曾受三朝祿此時邊徼多戰聲曳  
履謁帝登承明謝安笑却淮淝敵魏相坐測單于兵九

重移榻數召見夾城日高未下殿英謀密語人不知左  
右微聞至尊羨自從龍去不可攀公亦卧病思東山湘  
娥含笑倚竹立山鬼窈窕堂之側上書苦死只欲歸聖  
旨優容意悽惻內府盤螭縷金織賜出傾朝皆動色白  
金之鋌紅票記寶鈔生硬雅翎黑崇文城門水雲白是  
日觀者塗路塞城中冠蓋盡追送塵埃不見長安陌人  
生富貴豈有極男兒要在能死國不爾抽身早亦得君  
不見漢二疏千載想慕傳畫圖卽如草堂何處無祿食



覩竊胡為乎乃知我公真丈夫嗚呼乃知我公真丈夫  
二月四日部署宴餞徐顧二子

春日載陽官署幽東吳二子過我游庭空日斜吏人散  
窅然何異經林丘今晨驚蟄暖氣達昨夜哀鴻呼故儔  
中庭古槐蒼蘚溽上有百鳥何啁啾倉庚交交刷其羽  
君看巨細各有求明時冠軒幾邂逅得暇胡不攀淹留  
自從去年識徐顧令我意氣傾南州徐郎近買洞庭施  
顧子亦具錢塘舟浮生飄轉若飛藿倏忽聚散誰能謀

風光爛漫況復爾願寫清壺銷客憂故人苦稱不好飲  
舉杯入脣還復休妙歌時時激慷慨鄙夫何以答綢繆  
巖柝沈沈靜夜色北斗倒掛城南樓祇恐天明驅馬出  
攬袂延望河之洲

七峰歌壽范郎中淵

我聞桂陽江上峯平地突出七芙蓉三峯岩崿如列戟  
四峯裊裊翔飛龍孤水東來走其下上巖下巖惟古松  
有時雲霧滿四壑洞中仙侶時相逢使君磊落中行後

家傍前峯對江口暗想精靈盤礴初嶽降生申理或有  
平生氣與蒼壁高落筆烟霞常在手六載為郎不受身  
五十生兒將白首湘南新鮓紅勝玉燕京高會多名酒  
歲歲登堂娛笑笑歌我七峯為爾壽

送人還關中

得萬字

君不見劉毅貧時一擲常百萬君不見唐時鄭虔道高  
坎壈腹無飯英雄際會各有時人生豈必皆如願關中  
老翁燕薊客昔何慷慨今何怨王通無媒番叩關揚雄

有賦何由獻君歸射獵南山麓得錢且學樊侯販

寄兵備高僉事江

三月無雨乾殺麥六月雨多禾耳黑長江浪高蛟龍鬪  
淘河鷓鴣啼清晝此時憐君備吳越天陰不見日與月  
白衫鹽徒慣風濤我軍慎勿貪倉猝

寄內弟玉

自汝林居將一月我心不寧長悒悒郊寒歲暮風色苦  
曠野無鄰天雨雪亟欲載酒往問子冰路難行畏蹌跌

豈無輕裘與快馬玉也視之如敝屣此道於今識者稀  
勸弟寬懷慎藥物

雪柬鄭生

夜來雪花如掌大無事閉門但眠卧僵牛死馬非所慮  
天翻地裂疇能那近時好事最者誰徽州鄭生差愛我  
甕頭春酒不餘瀝天明梳洗午尚坐北風其涼二儀閉  
雪吹飛沙映天過老夫畏寒況無力生也乃是雄豪佐  
梁園之陌平若掌放兔呼鷹無不可不然騎驢學爾祖

乘興一鼓山陰柁

吁嗟行示周生

吁嗟周生千里駒今行不得如蟾蜍雖有寶劍寒吹毛  
一日不遇成鉛刀子不見豐城紫氣干雲霄鹽車之下  
多悲號張華伯樂行相遭

送鄭器

梁園仲冬雪積阻慘慘風亂平沙樹泥深馬瘦不得行  
縹緲金陵在何處青絲絡酒提玉瓶強出送子城東亭

旦望淮河暮江水雲飛鴻鴈天冥冥

寄鮑宇

愧我夷門草堂寂種菊蕪穢生蓬蒿爾家華堂近江許  
開花爛漫秋雲高去年此日同為客今年對菊遙相憶  
黃山練水在何處獨倚南牕望南國

三鶴歌為丘三公壽亦載厥實事焉

老鶴東來度海水與雌俱飛引其子回翔萬里始一息  
丘家麥田澤泚泚逍遙洗濯飲食足炯如煙雪無泥滓

此鳥千年丹始成口銜赤玉蒼龍精落地化作金光草  
采食還丹毛骨輕古來拔宅將妻子肯使丘翁地上行  
君不見贈鄭莊

君不見江上鴈嗷嗷喚儔侶勁羽輕毛常趁風往來漂  
泊如羈旅男兒落地既有身誰能齷齪猶婦人懷中有  
劍亦不貧吳下阿蒙君莫嗔

嗚呼行寄康子以其越貨之警

嗚呼皇天不可測一冬無雪春無雨黃霾翻風白日動



前飛禿鶯後飛鵠堂堂古路長蒺藜萬家之城走豺虎  
百姓誅求杼軸空兒號女啼守環堵饑寒盡化為盜賊  
可惜良民作囚虜腰弓帶箭百成羣少年馳馬仰射雲  
蒼山日落行旅稀醉唱胡歌各自歸山東趙實已授首  
南陽回賊同猪狗諸君但欲樹功業玉石俱焚理或有  
近者內丘大寧河橫賊八騎持干戈裕州知州與賊戰  
康也扶柩衝之過資糧蕩盡僅身免月暗天昏路途遠  
吉人作善翻軼軻痛哭寒城白雲返頃聞留滯在襄國

百口仰給縣官食吾兄匹馬走問之半月更復無消息  
夜立中庭北極高晝看河朔風沙黑汝寧以南土尤赤  
空城二月生荆棘斗米可以換嬌女牛馬餓死枯蒿側  
比來官吏守空印拖男抱女盡向北卽防此輩更充斥  
恐汝後歸歸不得

送席副使監貴州屯學二事歌

席名書字  
文同蜀人

我昔在北京送君向河南豈料在河南送君如百蠻瘴  
雲蒼蒼途路艱牂柯羅施皆峻山法官要自褰帷入條

忽開明衆山出大抵夷狄似禽鳥制之雖勤忌拘急此

曹亦是人心性頃來漸慕衣冠習文翁化蜀豈無本李

牧屯田務招輯所恨故人限萬里令我蚤夜心於邑丈

夫已際飛龍會野人猶抱枯魚泣感新懷舊心肺酸萬

事回頭百憂集弘治之間時世異與君次第陳封事許

身謬比漢賈生推君每稱唐陸贄朝回對坐香爐省出

門並結青雲轡自從分手哭遺弓縉紳漂泊余亦同抱

甕梁王修竹園遺址宋帝蓬萊宮生涯放逐似羈旅混

迹迂腐隨村翁曾聞伏櫪有老馬豈即道路傷秋蓬天  
下瘡痍況未息西南貢篚防難通杜鵑向識君臣禮蛟  
龍終收雲雨功相如諭蜀文章壯馬援平交德業雄扶  
危濟弱付公等臨歧悵望天南鴻

送鮑激還歛

昔時賢達或未遇途路坎坷常固窮鹽車騏驥亦拋棄  
人生豈得無西東君年五十猶未通江湖去住隨飛鴻  
黃山紫陽日索莫題詩蚤向軒轅宮

送鮑相如金陵

去冬君行雪積阻相送城東念羈旅今冬相逢不逾月  
再別令我情更苦金陵市頭酒如蜜此去酣歌與誰侶  
我在梁園獨岑寂莫教碧草生春渚

君不見贈馬僉事應祥

君不見庭中樹今冬憔悴春作花君不見桑上草含陽  
籍土抽紫葩富貴詐有種貧賤豈無涯君今身為指南  
車何不留之殿京華北遊漢水南長沙君雖在漢水與

長沙高不愁虎卑無蛇

得馮御史允中書

鳳皇不識梧桐樹一落蓬蒿鳥雀欺  
滄洲鴻鵠長毛羽縱有雲羅奈爾為  
昨日柳陽馮侍御臨流寄我錦雙魚  
黃河峻嶒雪十丈過臘逢春始得書  
開緘不見下江舸梅花滿枝空淚予

秋夜徐編修宅宴別醉歌

徐郎三杯拂劍且莫舞聽我擊節歌  
今古曲長調悲不

易竟天地熒熒月東吐燕山八月風力怒落葉交加映  
尊俎愴時感事百憂集死別生離同一苦身逢累朝全  
盛日弘治之間我親覩朝廷無事尚恭默天下書計歸  
臺府五陵鞍馬速雷電千官氣勢如風雨却憶年年秋  
月時日與爾輩同襟期如澠之酒差快意袒跣呼號百  
不思絃張柱促衣冠禍綜覈崩奔學士疲倉皇世事難  
開口物極則還理宜有羸疾已分沙田草遭逢復折都  
門柳富貴在天得有命人生反覆如翻手不見去年臨

別處吞聲躑躅鶯求友邂逅寒暄不自知  
隔絕榮華為誰守歌殘酒乾天欲曙  
門外驪駒已西首哀鳴胡鴈亦南飛  
露濕羣星朝北斗

發京別錢邊二子

秋風淅淅吹燕山游子仗劍出燕關  
車脂馬飽夜將發錢邊二子來相攀  
此時羣星覲上帝駟鸞翳鳳雲之際  
君不見牽牛與織女一水盈盈獨流涕

東園翁歌



東園翁今六十餘面常泥垢髮不梳身藏寶劍人不識  
反閉衡門讀古書此翁十五二十時歎唾落地迸成珠  
陸機不敢以伯仲管輅警敏空嗟吁生鱗即與蛟龍伍  
未汗寧同凡馬趨爾時射策黃金闕三百人中最英發  
驂騑舉足狹萬里便欲登天攬日月豈知德尊常轍軻  
獨買扁舟泛吳越三十年來萬事變富貴於我真毫髮  
歸來灌園種瓊花荷鋤自理東門瓜夜眠海月掛丹牖  
晝看江風滾白沙遼東合有逢萌宅齊西再覩陶朱家

北郡李生三十六擯斤高歌卧空谷前輩後輩道豈殊  
同坐同行限江麓東望東園亂心曲安得逐爾騎鴻鵠  
苦熱東屠參議

豫章之熱真毒淫六月已破仍不禁赤雲行空日在地  
萬里一望炎烟深東蒸扶桑榦欲槁黑河水乾龍不吟  
院松亭亭我所愛比遭摧炙無好陰縱令跣足欲何往  
此地寸冰如寸金屬簷大厦尚喘喙矮屋茅堂淚滿襟  
滕王有閣高百尋閣下澄江清映心紫薇使者卧其上

卷幔恰對西山岑赤脚門子搖大扇行坐吟哦揮素琴  
幾欲往訪簿書積豈我無酒同誰斟亭午蘊隆潭水沸  
蛟蜃下徙黿鼉沈何況走原獸棲枝禽嗚呼豫章之熱  
其苦有如此而我胡為營營與世爭華簪

白鹿洞別諸生

東南自有匡廬山遂與天地增藩衛山根插入彭蠡湖  
崢嶸背殺三江勢地因人勝古有語嗚呼萬物隨興廢  
學館林宮客不棲千巖萬壑堪流涕文米昔賢今尚存

講堂寂寞對松門  
松門桂華秋月圓  
拄杖高尋萬古源  
梅嶺古色照石鏡  
扶桑丹霞迎我軒  
絕頂坐歌霜月淨  
石潭洗足芝草繁  
更有冠者五六人  
峭崖窮嶂同攀蹇  
草行有時聞過虎  
旦暮時復啼清猿  
我今胡為公務牽  
蟋蟀在戶難久延  
出山車馬走相送  
落日遂上鄱陽船  
生徒綬戀集涯滸  
孤帆月照仍留連  
情深過厚亦其禮  
謏薄竊愧勞諸賢  
明朝伐鼓凌浩蕩  
五峯雙劔生秋烟

豫章遇鍾子送贈

豫章八月江勢輕水關行馬沙嘴平聞君纜舟挽君住  
向夕惡風銀浪生頃時收帆萬船集波顛石倒蛟龍立  
中流艤子獨何意歎仄猶搖雙槳入天清未風君已迴  
帆色迢迢萬里來拂衣漢口鳧鴈亂擊榜南浦芙蓉開  
漢口逢君又南浦人生聚散風中雨黃石公赤松子在  
何所君今抽簪我簪組

董公衙賞緋桃行

吁嗟董公垂老官不遷途雖坎坷志不變三歲提兵兩

列銜此事堪傷亦堪羨二月南風捲章水黃昏西省開  
芳宴刑司軍司皆集衙盆中緋桃俄放花董公捋鬚向  
客誇客起環視咸咨嗟情酣展轉移燈照酒氣撲花花  
欲笑逢人合與世醅酌衰顏苦被春勾調君不見玄都  
觀裏樹不與武陵源上殊時來開落各異地董公董公  
今宵與客且倒花前壺

得家書寄兄歌

三年路遙消息阻緘書實凍兄心苦鴻鴈無愁奮翅難

鶴鴿且暫遊寒渚時望東湖西日微雪冬廬嶽北思歸  
獨虞四海干戈滿生別悲傷見面稀

寄鄭生歌

南康烈風無時休將歸船滯增煩憂空城雪埋狐兔走  
十日凍合鼉河洲廬山咫尺不得往汝在梁園獨予想  
開緘歎恨東遊阻琅玕天姥春空長

余鄒二子遊白鹿書院歌

洞原路冰山徑微二子日遊過夜歸巖宮古刻徧覽讀

馬時蹌跌泥在衣頃來烈風號季冬雪霾不見五老峯  
苦心數子守寂寞我病講堂虛鼓鐘二子此行真特奇  
異時獨往今可知虎吟狐啼且不懼肯使楊朱泣路歧  
戲贈周紀善

廣文先生何為者十欲出門九借馬只今徒步襄水濱  
衰鬢漠漠常風塵鳳皇在笄雞啄食苜蓿闌干半青黑  
君不見楚筵醴罷暮歸來甌塵妻子無顏色

龍沙行別袁生



君不見玉虛觀前松去年凍乾今復生樹靈力排雷雨  
會榦大每與蛟龍爭下有萬古不定之龍沙風滾無時  
休英雄奮發各有時運至賈販皆公侯腐草尚為螢何  
況堂堂七尺軀萬物之靈高牙大纛不我畀石泉白雲  
誰復爭舉眼江漢鴻冥冥與爾倒此沙頭瓶

潯陽寄毛君湖口

大江六月涼風發匡廬清波滾明月削出萬朵青芙蓉  
水底搖動金銀闕美人盈盈坐湖縣昏叩石鐘曙晞髮

帳望迢迢碧雲合早晚扁舟向蠻越

鄭生山遊歸予作此歌

跂予望之六六峯欲往爭奈今嚴冬石林崎嶇積雪盛  
日中無烟虎豺病生也孤往胡所希凍攀幽嶮探其微  
手皴面黑逾旬歸太室少室何者竒曾否首陽歌采薇  
北却逶迤清洛遠天白冰崇伊闕晚灞上騎驢爾靡辱  
袁安高卧吾應覩忽然想生經行宋家陵往來寂寞東  
西京翹首淚下嵩山青

丈人行

丈人九十牙齒存行曳竹杖挈玄孫只知灌園同漢陰  
何須采藥遊鹿門山房春歸碧草萋蕙帳月白露滿蹊  
少微星沈湖水湧松林夜夜猿嘯啼

鶴癯子歌

鶴癯子汝人也而何為乎鶴形美髯修修雙瞳青閉肆  
夜讀黃庭經晨出荷鏡掘茯苓鶴癯子汝豈無萬里骨  
刀劒翻路遙朋寡日云暮弱水蓬瀛壯心隔君不見江

中老龍亦高卧鶴乎鶴乎誰汝那

寄殷給事中歌

斑鳩賦形百鳥內化為蒼鷹百鳥避秋空萬里試一擊  
灑毛紛紛稱鷹意迴旋簸蕩風沙開海寧光清鸞鳳來  
天地炯炯元精回此以贈君君毋猜金陵雖隔黃金臺汝  
翊紫蓋臨三台飛章御覽不十日道路閒靜豺狼哀憶  
昔匹馬長安走殷何徐陸皆吾友楚姬娉婷華色並殷  
生稜眉獨方口何郎短小亦不醜仳離今各經年久夢

寐猶存上苑花飄零寂寞西湖柳丈夫致身貴不朽陟  
要階華亦何有賈誼才名信早知姚崇相位非難取大  
江滾滾東北趨羣龍霜螯鼉叫呼汝登鳳臺念老夫為  
我致一鳳之雛我不敢玩亦不敢狎誠心餽飼毛羽全  
使聽簫韶翔舜都

送田生赴京歌

正月八日天驟黃大風晝晦沙飛揚河冰慄烈人不行  
駕鵝鵠鴈交踉蹌黃鵠呼曹厲毛翼一舉橫天向天北

君不見左生北上田生俱長安走馬花九衢

送陳冠歌

虎子墮地氣已麤驂騮汗血自為駒陳生垂髫骨即殊  
雙瞳炯炯唾成珠前年汝與計吏俱承明謁帝未生鬚  
丈夫志欲日月並雲雨且使蛟龍須冬風獵獵吹楚湖  
憐汝送母催楚艫調羹臘盡江門水戲彩春停汴上都  
憶昔乘驄按南國汝在諸生獨英特三秋自阻北飛鴈  
萬里今逢舊顏色私計彭宣晚必親敢言裴儉前能識

寒溫始知君子厚杖屨翻增世人惑瓠子柳烟風日和  
力疾送子臨黃河汝親日望泥金使老夫擬作瓊林歌  
芝泮行

崑崙子之來也李子觴焉及夜瓶芝自墮以為泮  
行觴焉平可檠二觴行之穩持之輕客大駭笑歡  
盡醉而李子賦詩

霜嚴夜清月在南燈明酒溫客氣酣銅瓶玉芝鏗墮地  
客將傳玩誇神異仰芝把蒂行金杯蒼文古紫當筵開

已驚激灩菡萏動更詫屈錯蛟龍迴憶芝初出盤精氣  
雲流石立颺颺避赤箭琅玕色盡枯神訶鬼守求非易  
洩秘真遭天地怒懷珍顧使時人忌自從獲芝升我堂  
琴書几席俱輝光晴日徐看瑞氣合炎天每挹仙雲涼  
燕山豪士來何方悲歌起舞宵未央芝乎自銜亦太異  
頓令四座深杯觴觴行逶迤月轉白月色芝光巧相射  
醅醕觸擊瑪瑙碎淋漓迸落真珠赤君不見玉屈卮金  
叵羅珠花繡草枉自艷停杯聽我芝枰歌



劉子有金陵之差遂便覲省

使君昔居紫荊關日登燕嶠望吳山逢人顏色鬱黯默  
對酒涕泗交潺湲使君南向金陵去孤帆夜拂春天樹  
旅枕常歎月落時夢魂先到雲飛處揚子江頭青草斜  
大孤山前開杏花行人三月重回首游子一年初到家  
出門烟草滿芳甸鳳皇臺接麒麟殿遊陌聯翩追宿娛  
墨場婉孌羅賓讌人生意氣無南北白馬青袍動江色  
卽看艤舸石頭城還聞稅鞅鍾山側鍾山翠峯壓秦淮

燕趙風雲入望來芙蓉秋鴈多愁思問君何日錦帆迴  
送仲副使赴陝西

驄馬白玉鞍長鳴下雲端今朝發汴水何日到長安孝  
王臺前雪如山垂楊掃地春風還使君不帶冰霜色却  
帶春風入漢關相思明月樓西望古秦州河南咫尺不  
可見何況千山萬水頭西望秦州是我鄉隴樹秦雲空  
斷腸褰帷仗鉞經行地欲寄雙魚到慶陽

徐子將適湖湘余實戀戀難別走筆長句述一

代文人之盛兼寓祝望焉耳

崢嶸百年會浩蕩觀人文建安與黃初叱咤皆風雲大  
歷熙寧各有人夏金鼓玉何繽紛高皇揮戈造日月草  
昧之際崇儒紳英雄杖策集軍門金華數子真絕倫宣  
德文體多渾淪偉哉東里廊廟珍我師崛起楊與李力  
挽一髮回千鈞天球銀甕世希絕鰲掣鯨翻難具陳洪  
川無梁不可越日暮悵望勞余神徐郎生長蘇臺陰二  
十作賦雄海濱竭來抱玉叩閭闔長安繡陌行麒麟是

時少年誰最文太常邊丞何舍人舍人飄飄使南極直  
窮金馬探瀘津爾雖不即見顏色夢中彷彿形貌真余  
也潦倒簿書客諸公磊落清妙身大賢衣鉢豈虛擲應  
須爾輩揚其塵休令黼黻怨岑寂要與琬琰增嶙峋海  
陵先生雅愛士晚得徐郎道氣伸喬王欵接雖不數邇  
聞亦欲來卜鄰驂騑造父兩相值一瞬萬里誰能馴都  
門二月芳草發御溝楊柳垂條新徐郎綰牒將遠適使  
我旦夕生悲辛為君沽酒上高樓月前醉舞梨花春天

明掛帆向何處鴻鴈哀鳴求故羣南登會稽探禹穴西  
浮湘水弔靈均洞庭波寒木葉下峽口風急猿嘯聞司  
馬太史有遺躅歸來著書追獲麟

龍州歌送沈編修使安南

龍州南接六那溪白鷗黑猿相間啼烏蠻灘頭苦竹密  
伏波廟前春日西揚旌走馬迎天使擁節封王壯漢儀  
試向殊邦觀禮樂交南元是舊邊陲

漢江歌送范子之桂陽

漢江江上鷓鴣鳴  
漢江遊客無限情  
青山落日下帆影  
芳草月明聞櫂聲  
黃鶴磯頭暮雲盡  
鸚鵡洲邊春水生  
莫倚仲宣能作賦  
洞庭南接桂陽城

聊城歌送顧明府

聊城纍纍枕桑野  
使君懷古聊城下  
龍蛇慘淡七雄鬪  
當時誰是排紛者  
海東隱淪難見面  
平原不見安平見  
已聞笑却邯鄲軍  
還遣書飛燕將箭  
平生急難輕列侯  
功成豈必千金酬  
只令往迹浮雲盡  
遙矚滄溟日暮流

畫鷹歌贈鮑帥

鷲鳥決眚如愁胡  
猛將氣每吞匈奴  
自將黑鷹掛堂壁  
百鳥窺之不敢呼  
安得此鷹生即起  
擊兔擒狐日千里  
將軍彎弓騎紫騮  
一箭射天落旄頭



空同集卷二十



欽定四庫全書薈要卷一萬六千九百十二

集部

空同集卷二十一

明 李夢陽 撰

七言古四

朝飲馬送陳子出塞

朝飲馬夕飲馬水鹹草枯馬不食行人痛哭長城下城  
邊白骨借問誰云是今年築城者但道辭家別六親寧  
知九死無還身不惜身為城下土所恨功成賞別人去

年賊掠開成縣黑山血迸單于箭萬里黃塵哭震天城  
門晝閉無人戰今年下令修築邊丁夫半死長城前城  
南城北秋草白愁雲日暮鳴胡鞭

胡馬來再贈陳子

冬十二月胡馬來白草颯颯黃雲開沿邊十城九城閉  
賀蘭之山安在哉傳聞清水不復守遊兵早扼黃河口  
即看烽火入甘泉已詔將軍屯細柳去年穿塹長城裏  
萬人齊出千人死陸海無毛殺氣蒸五月零冰凍河水

當時掘此云備胡胡人履之猶坦途聞道南侵更西下  
韋州固原今有無從來貴德不貴險英雄豈可輕為謨  
尚書號令速雷電抱玉誰敢前號呼遂令宵旰議西討  
茲咎只合歸吾徒我師如貔將如虎九重按劍赫斯怒  
惜哉尚書謝歸早不覩將軍報平虜

張將軍塞獵歌

將軍堂堂七尺軀虎頭昂藏紫虬鬚據鞍笑撚金僕姑  
弦鳴仰墮雙飛鳥南平川漢北殲胡蛇矛卧地刀劍蕪

朔風吹霜塞草落馬騰士奮于狩作將軍夜令晨步同  
磧沙黃黃日色薄部下遊擊五千人競時爭能各有神  
驅飛翼走入我網千隊萬隊何駉駉氣酣前赴逞一決  
零亂旌旗倏明滅殺氣上回靈武雲火烈直透天山雪  
張公觀此番逡巡紅衣白馬如神人衣也蟠蟒金麒麟  
朝廷所賜榮功臣攔頭報捷者誰子手提禽獸血滿身  
生截羆豹累雉鶉中軍小校額抹巾見之一騎風起塵  
左射奔鹿右斃豕更追狡兔趨窮榛張曰於乎奚用是

昊天肅殺存至仁  
縱金按節止中野  
燭脂魚鮮燕蒐者  
禮樂行軍分自嚴  
賞罰正簿誰能假  
何地真收吐谷駝  
一卒乃獲大宛馬  
長城窟冰胡雁稀  
輕輦緩吹諸部歸  
懸戟慘淡鴉鳥委  
垂鞍礮礪熊兕肥  
少年猶忿殺獲微  
翻身殼弩追雲飛  
我聞蒐狩古侯禮  
三驅六御今何以  
纘武雖存于貉文  
戒荒合避長楊侈  
將軍秣馬厲部士  
為防西北烽烟起

送全儀賓朝天歌

風吹黃塵暗河甸行子拍馬來相見春寒晝陰沙冥冥  
九衢散亂花如霰自言手捧紫瑤函馳軺謁帝黃金殿  
甥壻當朝禮覲同往來遣答猶親面南陽貴人骨固殊  
敦親倍錫明光宴八議輕微實惋惻時情詎識皇心眷  
開函爛漫百色備龍盤鳳曲流雲氣繡女咨嗟鋪緒工  
體裁脗合三宮意吳羅疊雪祇懷赧南金象齒堪沉避  
自離京國十年餘每懸金闕憶金魚班行日侍諸王聘  
混一曾瞻萬國書君過上林聊駐車春風舊樹花應舒

有暇更欲問西湖掃地垂揚今有無

送田氏

寒城野霜鴻嗷嗷羊腸木零熊豹號彼汾沮如望心勞  
葭莢委折風波濤山西刑司氣何豪西邁白日行旌旄  
七星九九明佩刀君不見黃河飛雲立如蓋一鷲乘之  
向并代

贈鄭郎

郎來張拱向我揖玉樹亭亭我旁立叩之論語背誦畢

曲禮幼儀汝能習黃河柳綿飛欲盡練水桐花放將及  
汝父昨來今汝歸有琴在抱書在笈君不見師山後人  
代非乏勉旃無效羣兒狎

太華山人歌

山人昔居太華峰結屋玉井餐芙蓉夜隨金精朝白帝  
誤過天鼓撞鴻鐘帝怒謫之荒江濱淚添江漢齊朝宗  
閭闔九重豹虎蔽霜雪十年鴻鴈冬江邊諸山不可眼  
夢寐猶跨雙茅龍有時夢到西嶺坐環海內物盡么麼



一線黃天涇渭流  
拳石白晝岷峨破  
翳鳳駝鸞覲玉京  
羽節雲輶度婀娜  
織女虛無指前路  
沐髮有盆不借我  
山鬼含笑倚巖立  
仰看明星斗如大  
猿啼蛇吟萬壑靜  
山人歸來淚交墮

相逢行贈劉按察麟

一別六年不相見  
風塵歛覲劉郎面  
西關官亭車馬都  
使君驄馬朱雀符  
有虔秉鉞映交衢  
把臂道故情鬱紆  
仰視高天白日徂  
憶昔同殿含香趨  
萬事反覆難具鋪

秋風颭颭響枯樹蛟龍立鬪黃河怒舟子無憂浹旬阻  
大夫且試登高賦城南柳徑梁王苑廟門書院松林晚  
此時與子臨高臺邊侯綺席金尊開芒碭微雲氣出沒  
但見悲風萬里從東來寒空孤鴈叫且哀鴉鷓鼓翅號  
其儕飛沙激霧相徘徊願賓與主酩酊歸不見昔時杜  
甫與高李三子者氣壓百代今塵埃

王郎行

王郎行者贈王氏二郎者也王郎將試於有司子

於是賦王郎行贈焉夫子賤君子稱之魯碩人族  
類彰諸詩蓬麻自直事有本因子故侈其家世并  
及其父子兄弟之間

將軍開國弓劍傳子孫章甫能朝天相國沈冥二十年  
懷寶弗售人所憐飛纓躍馬赫動地公也視之如浮烟  
雅歌日醉金尊前生有三男子不令學劍令青編大郎  
早躡黃金榜聲名佐郡青雲上二郎禮鬱更英特掇青  
拾紫猶翻掌三郎年十餘頭顱角斬如拱立向人前解

背經與書二郎昨別我云將還故鄉馬蹄馳逐秋槐黃  
龍泉出匣光自射驂騑歷塊疇能當連翩騎從喧皇州  
春風紫陌行鳴騶生兒當如孫仲謀吁嗟相國胡所憂  
濁醪惟恨不滿甌聽我王郎行我行還自歌何以贈之  
珊瑚柯又何贈之玉山禾願郎歸白玉珂

郭生行

君不見大梁郭生少小能英竒生長富貴心寒飢兀坐  
日誦書與詩下究王伯上軒羲郭生有父王國賓有母

食邑稱之君鯉庭獨立猶詩禮熊膽親丸或夜分生有  
兩男子大者覽輝起次者郭生鼓翅亦上青霄裏憶昔  
匹馬走燕甸長安三月花如霰射策曾登金馬門垂衣  
帝在蓬萊殿三十年間萬事變後生哀哀蜚英彥結綬  
初宣東閣賓彈冠復報南州薦太平旣極邊功開武帝  
射蛟江水迴上林會有誇胡獵願生早試長楊才

結交行贈李沔陽

古人結交如種稷今人當路栽荆棘世間萬事各有極

人生何必相傾仄君不見李沔陽五馬昨朝天冰地  
裂衝寒烟三月不遇見天子歸途困頓心憂煎南行波  
濤值洶湧蛟龍失勢鼃鼃踴留滯聊栖梁孝臺醉歌真  
據侯羸塚却憶當年侯未鬚識者盡道驕駒落筆遽  
掩羽獵作挺身遂上青雲衢百戰不侯李廣辱一麾出  
守延之吁峽霾光射卞和玉月明淚迸鮫人珠李沔陽  
汝無學雲夢吞亦莫效江南哀六龍挽車日月輪萬里  
簸蕩風沙開棄君舟楫理銜轡有人物色騰驥材

薏苡行贈王氏

南征馬援還東都人言滿載皆明珠發封視之乃薏苡  
羣臣失色天子吁世情毀譽本好惡後生輕信迷真誤  
暗投固宜明月棄同居豈免娥眉妬自君夙夜歌在公  
尊中醴酒常不空德尊日見兒孫盛名成反致讒邪攻  
雖云喬樹多烈風曷有寸霧殘高空君不見周時吉甫  
稱大賢孔門弟子推顏淵掇蜂拾塵尚見惑豈我千得  
無一愆君堂有客俸有錢槐庭偃蹇花含烟胡不酌酤

金罍前萬事置之休問天

徒步東行贈鮑澂

鮑生六月徒步東久曠赤日昏沙風旦行眼眩扶桑紅  
足疲暮憩空桑中帽浥衣沾乾復濕必逢佳樹始一立  
道傍有驢無錢騎短詠微吟口翕戢杜甫遺詩人罕全  
鮑生記之將及千論工尚恨黃初淺泥古常卑大厯前  
豈知才大翻為崇臨歧獨下楊朱淚鹽車雖蒙苴滓辱  
長鳴未折風雲氣生今坎壈三十年同時細估豪熏天



出門寶馬雙翩翩道逢鮑生不舉鞭生不見五殺大夫  
歌屨屐商歌飯牛聲夜悲賢達困窮何代無仰視萬里  
浮雲徂

夏日田居蘇生攜酒見過

疾風六月樹枝折火雲纍鉞白絮裂城南老夫正高卧  
荒郊款段蘇生過塵埃滿面鬢髮亂手攜清壺來餉我  
季子才名三十年射楊百發百葉破逢時幸首南宮薦  
塌翻尚忍西山餓丈夫生世古難同蘇也巷西我巷東

追尋不計襜褕熱淹留祇恨金尊空君不見昨朝雷雨  
今則風世事反覆誰豫通得時無誇好身手失意豈必  
皆愚蒙野池紛披蓮半紅黃鸝喋語空林中勸子盡醉  
休匆匆人生幾何吾已翁

送人使安南

安南陪臣騎馳突歌吹春喧淚水窟蛟潭飛雨動霹靂  
島城毒雲開日月黃門使者白澤袍南來氣與秋天高  
當今天子古聖人諭爾歲事勤包茅永令炎海無波濤

有鶴篇贈翟翁

有鶴褊褊海上來乘風爰止梁王臺  
洪河怒濤野蕭瑟含情顧影却飛迴  
十洲來往羣仙戲舉身上下隨雲氣  
君不見夜來東海頭南極一星光照地

賦得姑蘇臺送李推官士允

少年何官騎白馬秋日經過古臺下  
回瞻遠慮意撼促下馬行歌淚盈把  
猗嗟築此誰為臺千年棄土猶崔嵬  
廡廊娃館瓦礫積美人白骨生青苔  
枯蒿蟲吟莽颯颯

飛雲叫鴈雙徘徊當時金屋玉起樓豈謂臺成麋鹿遊  
寶鈿黃金裏瑟瑟雨時濯出樵人收李生豪士扶風儔  
悲歌久抱流連憂世家各讀日一過獨廢吳越傷春秋  
復思鴟夷氣益奮怒目每送長濤流扶眼東門事已往  
茲臺再過君休上日暝烟波湖水深范歸恐有同行槩

送王子歸鄆杜

賢兄已上蒼龍閣令弟猶甘飽藜藿膝下雖無一寸綬  
腰間常吼千金鏑騎驢狂走長安市酣歌擊缶白日落

黃金不成徒自歎烏裘脫盡那堪著道逢石室舉鞭揖  
謂爾骨相殊不惡終南鄆社豪俠窟從來意氣無京洛  
歸家早鑄雙玉龍提攜來獻明光宮

贈鄭生

狐裘騶馬誰家子往來馳驟塵沙起右撚羽箭左把弓  
仰射忽墮雙飛鴻野寒日昏慘慘風下馬揖我立我東  
一箭直西貫楊樹抽身上馬入城去

石峯子歌

石峯子昔住石峯山茅堂巖壑豁豁間松孤桂叢白日  
靜坐玩碗礪聆潺湲石峰子驂鸞覲帝今幾秋狄猿哀  
嘯鴻鵠愁頃為四岳振南州珠崖瓊海毒厲收丹穴有  
鳳鳴啾啾願子早致儀西周經過舊山莫淹留君不見  
舊山頭葛藟蔽翳寒泉流

寄寄庵子

寄庵子嘗曰人生寄爾然利孰與義安愆孰與美  
久臭孰與芳永庫部駱子以其言告李子李子曰

卓哉張子持此於天下誘之能移撼之能動乎能  
招之來麾之去乎於乎張子者足以荷天下之重  
矣於是作寄寄庵子詩

嚶其鳴矣彼何求天下願識韓荆州心傾義投神便往  
萬古不廢江河流張侯崛起西南裔覽輝振翮風雲際  
鉤陳蒼涼閭闔閉排闥直謁蓬萊帝豸冠峩峩不動紳  
挺身遂作蘭臺賓竊憤辛裾謂渙忍誓與朱檻爭嶙峋  
已看騷裏狹道路復訝鷓鴣早風塵霜飛維揚海月苦

陽行沮洳汾花春還朝衮衣換日月立仗正色指星辰  
行步既工馬從瘦諫草每就難將晨餘力猶馳翰墨圃

先秦兩漢文心苦壯志真趨劔閣銘

張孟陽

幽懷緬擬歸

田賦

張平子

拖朱響玉豈不足覲面徒餐竟何補及時願

作朝陽鳳不然退與漁樵伍予也綸竿孟諸客心本無  
他衆莫白李白世人欲殺之蘇軾能詩遭貶斥雷劍雖  
埋光在天下玉未剖終為石垂老重逢四海清虛名幸  
免諸公擲思君欲追嵇呂駕贈言輒踐回由迹

顏淵季路

有



田負郭不餓死且自射獵芒碭澤

龍仙引贈駱員外

壯士狹四海萬古一大夢俗夫醢雞耳生死不出甕滅  
沒等蒿草勞勞竟焉用君求勾漏學稚川往來棲息羅  
浮烟自從異人授丹訣行地乃作飛龍仙左攜浮丘右  
洪厓樗里景純執我鞭崑崙嶠躡倚天外黃河九曲如  
衣帶南支江湖楚蜀匯北支嶮塞華夷界少時振衣登  
賀蘭開眼已無西北山中年謁帝聽廣樂曳裾赤手搖

天關朝攬金臺雲夕披玉峯霧翔鸞鏘鏘導前路左蹲  
文豹右伏虎旌幢旖旎雜翠葆龍兮龍兮汝雖變化叵  
測慎無使頭角露祥麟威鳳世見稀泄秘盡巧鬼神怒  
深山大澤多蟄鱗龍也穆沕幸自珍緱城玉笙兩鶴舞  
太室珠樹三花春從茲謝人放浪去笑跨白鶴乘飈輪

送李中丞赴鎮

黃雲橫天海氣惡前飛鷺鶴後叫鶴陰風夜撼豎巫閭  
曉來雪片如手落中丞按轡東視師躬歷嶮隘揮熊貔

已嚴號令偃鼓角更掃日月開旌旗  
椎牛李牧將士躍射虎李廣匈奴知  
屯田金城古不謬賣劍渤海今其時  
塞門蕭蕭風馬鳴長城雪殘春草生  
低飛鴻鴈胡沙靜遠遁鯨鯢瀚海清  
不觀小范擒戎日誰言胷中十萬兵

雨燕醉歌

迅雷擊城鴉欲翻黑雲壓天白晝昏  
展席叙對城南門長安大雨如傾盆  
我馬已惜錦障泥主人況具黃金尊  
睥睨將將下萬瀑龍蛇繡繡動高壁  
出門牛馬不復辨

炎霧毒蒸靜如拭酒酣為君如意舞夕雨轉急風轉怒  
祇恐谿壑受不得海倒江翻亦難測

顧侯寄陳留公砥柱障子并詩予為作歌

東吳顧子相公客掃絹畫水復畫石天衝地擊河怒號  
嶷嶷一柱當橫濤突立固知氣勢穩鼓盪轉見觚稜高  
淋漓新題墨猶濕封緘遠寄心誠勞昔公平章握軍國  
執義委有排山力甚哉顛如漢汲黯老而純過唐師德  
言違諫阻去何決羣猜衆怒不動色同時門客顧最親

隔絕夢寐懷偉人  
我我砥柱公實倫  
顧也歌之情句真  
畫者誰子筆更新  
數尺絹面開嶙峋  
遂令觀者重回首  
堂上恍惚河聲吼  
欽岑若邁虎豹踞  
蹠沓似覩蛟龍走  
竒怪常虞霹靂奪  
孤危定遣神明守  
君不見鰲極有時  
艤崑崙有時翻柱  
乎柱乎永且安

雷電行贈憲卿何公美其伐也

黃塵蔽日賊大戰  
元年年除夜雷電  
我軍後之天威前  
一鼓破賊淮陽川  
昨者此賊生齊東  
眼中久已無河嵩

渡河轉戰勢果熾長矛健馬六石弓睢陳飛刃晝接白  
毫頰劫火宵連紅一路生靈餵餓虎中原殺氣回春鴻  
于時中丞秉鉞出誓不滅賊如此日三軍素壯元老猷  
諸將咸遵丈人律孔明綸巾不離首羊祜輕裘僅掩膝  
精采遽增朱雀幟運用或參白猿術陷陣直如風掃葉  
追北譬之蜂就蜜二月朔日振旅歸夾道桃花照鐵衣  
傾城盡出牛羊犒父老爭迎錦繡旂喜氣真隨陽氣發  
愁雲化作卿雲飛捷聞天子喜動色滿朝譽公降褒敕

白金綺繒寧足酬異日凌烟看畫墨

送兒詩四首

冬至至後風愈嚴野冰皓皓霜凍髯河澌日昏不易涉  
孤劍匹馬慎汝楫

北風蕭蕭狐裘薄蔽堤立馬勸汝酌汝伯煨酒友奉盃  
路人不行為踟蹰

壺乾日斜客子發臂弓上馬意氣勃斬蛟擒虎及汝時  
我幸健飯無父思

平生自許萬言書  
今往謁帝承明廬  
春風走馬未為得  
下有管樂上契稷

邊馬行送太僕董卿

治賢在朝亂在野  
唐虞圉牧皆賢者  
國君之富馬為急  
次者僕御首司馬  
漢人五郡開河西  
中土始聞胡馬嘶  
此馬碗礪一直萬  
黃金寧輕璧可賤  
奪駿曾空大宛國  
按圖徑上長安殿  
首肯雖誇近苑春  
荆榛誰記沙場戰  
致遠蕃歸草木功  
清芽秀味走胡驄  
三邊盡跨連錢種



六苑羣嘶汗血風人亡世殊霜雪急草豆蕭瑟馬骨立  
驂騑氣喪甲士苦長城窟寒鴻鴈集朝廷每勤西顧憂  
四岳拜手推董侯攻駒暫出薇花解攬轡遠過葡萄州  
行卿官冷心不冷固知董侯今伯冏磧沙日黃雲錦亂  
徵侯定上金華省

風沙篇送王生北行

顛風吹沙江海波汝乘玉駟超天河豫章千尋勢自穩  
黃鵠萬里誰能羅我逾五旬鬚盡白日采山精煉白石

臨分贈汝一粒丹願言寶之勿輕擲

贈張帥

張侯五十毅強弩遇敵控馬氣如虎年來威坐都統衙  
境內盜息無塵沙自言少壯從征虜北掃胡漠南闔楚  
暇時勤出射雲鴻古來矍鑠成大功

贈鮑帥

蒼鷹自與凡鳥異虎子墮地食牛氣鮑侯三十名譽成  
才猷吐布千人驚只今塞上風塵起朝廷拊髀思頗李

君之寮采皆英奇同升早勒燕然碑

白河篇送李南陽

白河日赤沙吐雲人喧吏闕迎神君三月萬花擁車入  
滿城竹馬兒童出君昔坐郡襄漢東氣勢三楚生雄風  
槩奸無論漢張敞秉義直到唐梁公霜飈偶折奮翅鷲  
日月竟照凌寒松鐵榦久擬作隆棟劍翮卽睹追飛龍  
空同老儒不君識傾蓋逢之喜動色論文開口夜嘗旦  
憤事扼腕晝遽黑南陽雖邇路終隔音書易通見難得

我欲扳君數日住南民望之餒待食君心透徹皓如玉  
壺之清冰君材磊落歸如萬仞之立壁高議足以排山  
嶽偉文足以華人國只恐茲邦難久留漢庭來徵郭細  
侯

汴河柳送沈生

汴河柳嫋嫋拂地長雪花風起春飛揚送君立馬古堤  
口踟躕勸盡黃金觴有車鞦鞞官道旁轅駒喘噉何傍  
徨於中豈無神駿骨伯樂不遇誰為彰人生富貴信有

命英雄仰面高天蒼高天蒼飯牛牧豕皆騰驤

王孫饋冰詩以酬之

流金毒日赤墮地忽有冷色寒人心誰敲水晶迸大壑  
力剖冰井開重陰高盤礪堆久不化老齒澆滯差能禁  
安得移之白繞座一尊一酌還一斟

贈趙將軍

豐沛之間河亂走洶洶之勢成陂藪大船愁淺小愁賊  
賊船如飛葦灘黑自從將軍鎮東土晝夜人行路不澀

將軍本是將門種，軀幹堂堂萬人勇。入山縛虎百獸懾，  
赤手批蛟色不動。射楊葉盡矢亦盡，始知百發還百中。  
武宗見之屢凝顧，戟郎遽拔千夫總。英雄自古不下人，  
將軍獻策況有文。驂騑暫蹙歷塊足，鷓鴣竟上橫秋雲。  
世情金多位乃高，圖名交結須賢豪。將軍無錢自樹立，  
於人傲氣但長揖。擠出事體雖云乖，威勢我喜行河淮。  
黃流穩帖遁鯨鯨，白日光彩收狼豺。大同反刃血未乾，  
甘州累卵人心寒。薦書何由至天子，拜將早築黃金壇。

贈胡石陵

世情認假不認真  
脂粉羅綺登上嬪  
蛾眉入室衆女妬  
辛苦年年織紉素  
織成進君冀君憐  
腐草迴日光在天  
荆山石中抱神異  
氣如白虹勿輕棄

贈滄洲道人

滄洲道人年半百  
顏如渥丹髮不白  
飢餐玉芝坐雙鳳  
渴收石髓煮金液  
海月西照寧仙橋  
道人橋頭吹紫簫  
夜半雞鳴日毬躍  
扶桑滾滾生紅潮

送李帥之雲中

黃風北來雲氣惡雲州健兒夜吹角將軍按劍坐待曙  
紇干山搖月半落槽頭馬鳴士飯飽昔為完衣今繡襖  
沙場緩轡行射鵬秋草滿地單于逃

贈張生

男兒三十骨格成貧賤富貴皆天生張生廣額日月角  
自幼勤書飽文學十年雌伏人不知一日雄飛動河嶽  
君不見宋朝宰臣云姓周少時坎坷風塵游偶然後夜夢



更美鬚泥蟠遽爾行天衢

送王封君還四明

季札如魯請觀周子長足跡半九州向平且然志五嶽  
誰肯齷齪終一丘封君去年出吳越長嘯梁園醉秋月  
春風垂楊縮不住便復歸山採薇蕨鑑湖花開雲錦浮  
鳧鷖前導紅蓮舟餐霞坐收赤城氣晞髮卧看扶桑流  
古云徐卿百不憂君亦滾滾生公侯君不見大郎繡衣  
昔持斧聲名赫赫今臺府

何儀賓生日贈歌

賓客白馬黃金鞭入門長揖皆戎冠堆冰五月窗閣冷  
風簾碧篔光琅玕主人平生貴然諾季布一言重山嶽  
人聞杜良數郡至坐無車公衆不樂列筵解帶羅庶羞  
萬年為壽千金酬向夜銅槃灼絳蠟鳳笙龍笛何啾啾

七夕贈王昌程誥

橘酒椒羊召朋侶擬向今宵看牛女雨來颼颼楓林秋  
張燈促燕開東樓王侯既駕鐵馬立前驅北首旌旗濕

程生買棹亦欲歸長江南望雲飛飛人生去住料豈得  
一日同歡有南北君不見雙星一水意脈脈轉眼陰晴  
不可測且倒金尊澆我萬古之胃臆

再送沈生

去年酌汝池蓮紅今年的汝黃菊叢秋風颭颭吹枯蓬  
飄轉向西忽復東世情敬貴不敬賢黃金不多人不憐  
如脂白玉隱在璞孰肯剖致君王前白河馬歸玄鴈起  
南陽賓客梁園比送君高歌枚子篇修竹檀欒夾池水

空同集卷二十一



總校官庶吉士臣侍朝

校對官編修臣閔惇大

膳錄舉人臣嚴儀

欽定四庫全書薈要

集部

空同集卷二十三

詳校官侯補通政司經歷臣郭祚熾



欽定四庫全書蒼要卷一萬六千九百十三

集部

空同集卷二十二

明 李夢陽 撰

七言古五

李進士醉歸圖歌

誰將一幅雪白絹放筆橫掃黃金殿五雲飛花白片片  
李生胡此開生面御河塵昏楊柳暮彷彿初罷南宮宴  
皇帝龍飛十二春同時三百登要津曹生李生余最親

曹錫李也傳經人光耀雖云丈夫末不聞致君須致身  
自汝白手扣閭闔想像紫陌行騏驎曹留李歸事亦變  
李生意氣圖中見醉歸扶起杏林下眼花熟人無識者  
飛鳥來窺進士巾遊絲故冒誇官馬即論此馬亦有神  
畫出紫焰方瞳真嚼勒齧膝如待人長行大步不動塵  
絡頭匝匝純用銀細巧似織翻江鱗汝昔出門驢無騎  
曹生共被甘鹽齎比許欲入周召列成就恥與蕭朱齊  
於乎男兒一旦榮幸果如此生不報國老空悔



鄭生畫像歌

巖風颯颯樹葉赤  
秋林紫氣丹丘積  
問君胡為坐石根  
微吟極望天雲昏  
南歸舟楫杳將滯  
故園花鶯當復存  
浚儀張生好作筆  
貌爾形似兼其魂  
細模妍拙豈乏手  
傳真水月烟中柳  
意氣朗如千里骨  
精神合居萬人首  
憶昨觀君飛射時  
彎弧走馬實男兒  
更求張筆須傳此  
欲識英雄豈啻詩

畫魚歌

呂公手持畫魚障清晨掛我北堂上島嶼晴開雲蕩蕩  
衆魚出沒隨風浪四壁蕭蕭起寒漲嗟此數尺障天機  
妙入神信手掃絹素慘淡開金鱗濠梁斷裂東津遠任  
公掣釣滄溟晚此時天黑衆魚出鼉鼉徙穴蛟龍返或  
言乘潮萬魚集細小亦趁雲雷入咫尺波濤有得失崛  
強泥沙恐難立細觀又似洪河風崑崙旣道龍門通霹  
靂殷殷行地中鯉眼下射盤渦紅非獨一身生羽翼亦  
有數子隨飛龍山根小魚更無數鱸鮓昂藏噴烟霧美

人修竿淇水闊漁子孤舟洞庭暮我生好奇古覽畫心  
不動呂公此障誰為之令我一見神色竦想當經營始  
筆端萬鈞力五湖齊傾四海立空牕滾滾拔浪急陽侯  
逆走天吳泣不然千魚萬魚何由集我聞神怪物變化  
不可料點睛破垣古有兆卽恐風雷就壁起饕人揮刀  
莫相笑

林良畫兩角鷹歌

百餘年來畫禽鳥後有呂紀前邊昭二子工似不工意

吮筆決皆分毫毛林良寫鳥祇用墨開縑半掃風雲黑  
水禽陸禽各臻妙掛出滿堂皆動色空山古林江怒濤  
兩鷹突出霜崖高整骨刷羽意勢動四壁六月生秋疇  
一鷹下視睛不轉已知兩眼無秋毫一鷹掉頸復欲下  
漸覺颼颼開風毛匹綃雖慘淡殺氣不可滅戴角森森  
爪拳鐵迴如愁胡昔欲裂朔雲吹沙秋草黃安得臂爾  
騎四鐵草間妖鳥盡擊死萬里晴空灑毛血我聞宋徽  
宗亦善貌此鷹後來失天子餓死五國城乃知圖寫小

人藝工意工似皆虛名校獵馳騁亦末事外作禽荒古  
有經今皇恭默罷遊燕講經日御文華殿南海西湖馳  
道荒獵師虞長俱貧賤呂紀白首金爐邊日暮還家無  
酒錢從來上智不貴物淫巧豈敢陳王前良乎良乎寧  
使爾畫不直錢無令後世好畫兼好畋

吳偉松窗讀易圖歌

仄巖泉流石無數素壁濛濛起烟霧君家屋宇在城市  
何以堂上生松樹側聞江夏生氣酣掃豪素絕筆風雷

拔地起意匠鑿天天為怒泰山古根生眼前俄頃縮出  
徂徠山懸蘿掛薜裊裊黑復有草舍松之間牕間老人  
鬢髮秃手翻一編周易讀空山琴瑟翠濤激長干冥冥  
暮花撲遠知既已死希夷不復作青丘石室杳何許恍  
然置我此溪壑翻愁一夕雷電入六丁追書上寥廓又  
畫石下根屈曲如老龍胡奴暝踏孤岩崧蓬頭赤腳露  
兩肘月明汲泉山澗中却憶前年召畫師江夏吳生亦  
與之短褐垢臉見天子禮貌雖村骨格竒帝令待詔仁

智殿有時半酣被召見  
跪翻墨汁信手塗白日  
慘淡風雲變至尊含笑  
中官羨五侯七貴爭看  
面請觀此幅松舍圖黃  
金失價連城賤吳生吳  
生太氣岸一言不合輒  
投硯

鍾欽禮山水障子歌

鍾子始學戴文進後來頗自出  
機軸山林槎枒波漫靡骨格  
雖傳氣不足此幅樹石差可  
意綴得茅堂傍江麓連山遠  
勢亦可取轉折頗似瀟湘曲  
竹嶼陂陀九疑隔

蒼梧洞庭濕雲白黃陵美人把瑤草天寒日暮行空澤  
鷓鴣雙飛鴻雁宿榭樹颯颯江水碧細看谷口花又疑  
武陵源孤舟欲往不可得對此彷彿聞清猿亭間更著  
四老翁衣冠各異鬚眉同紫芝山深石漠漠悵望萬里  
來悲風人生有形貴自適我今胡為塵埃中觀畫感事  
面顏紅有畫如此何必工歌徹目送滄洲鴻

贈郭氏畫登遊快閣

昨朝快閣舉目無江湖凭闌二豪俱徘徊把杯思欲丹



青寫之人則無城中郭清狂一生弄丸戲洪壚方瞳如  
水霜半顱展紙為掃登閣圖邑城隱見林木扶畫我快  
閣上半天風立樓觀孤急流波濤沸欲動前山雷雨勢  
可呼二豪意態各亦足彷彿指說荆與巫回顧東海猶  
一盃是日南風萬船集江隅郭亦畫出檣之烏精密似  
跨北海杜筆力頗凌江夏吳江中流雲西北徂又若萬里  
獨往朝京都我心與客方念此郭能畫之真奇士

觀序上人所藏陶成畫菊石歌

陶生畫菊石潦草有筆力此石與此菊今為序公得兩  
株徙倚石根前古石苔蘚屈連錢復有餘株散在地平  
坡雜草青烟絲回株點綴花翩翩含姿弄態不一足背  
向纖穠皆可目突如大家貴介女珠翠雖搖氣莊肅近  
時名手計汝和此生筆力方之過江東徐霖學畫石效  
顰差勝王與何亦知神品多冥契下筆巉巖拓高勢石  
磊磊兮菊漫漫清霜古路花斑斑遠意頗類東林山東  
林昔築蓮花臺彭澤攢眉不肯來歸家對菊獨銜杯序

公叢林號白足不重蓮花翻重菊終然畫餅不充腹何  
如種向西山麓秋林寒芳采服食煮石煉藥亦為得愛  
鷹愛馬古有之不獨序公何太息

題畫

雪城陰陰氣蕭瑟鄭生提畫來相訪面顏戚促意不樂  
告我欲買南行舫覽畫指點色惆悵雨倒江翻拔層浪  
君不見江上蓑笠翁歸遲水逆憂天風

其二

江寒雨急莽無路漁人撒網乘烟霧魚蝦瑣細不直錢  
汝休輕觸蛟龍怒展畫見此心中悲犯險覓利古所卑  
只今風浪無晨暮為問安流歸者誰

張侯藏張翬山水歌

張翬有名成化間大塗小抹成山水樹石燥硬筆意古往  
往人間落片紙此幅麤淺色更枯或謂非翬出其子張  
侯識鑒天下精物物如金見沙底爾家圖畫千萬軸素  
壁高堂安用此寧知上智不滯物北牡不貴貴者骨尺

山即如對玄圃草屋臨崖氣出沒崖根林堂頗清迥遠  
雲澹沲開秋嶺霜蘿細紆巖檻暝昏猿接掛花溪靜自  
從去年拋棄官夢想山遊駕江舸見此拂衣便欲往攀  
緣轉玩情無那崖亭更著一人坐斗絕看書樹婀娜張  
侯豪曠人共知敏捷言談皆勝我鹽車鬱沒騏驥棄蹇  
拙逢時每相左崑崙洞庭不我隔異時倘結烟霞果

畫馬行

嗚呼驂騑不可見世人任耳不任目玉勒金羈滿地行

可道中無千里足君收此馬畫者誰凝毫苦意求其骨  
尺縑颯爽毛鬣動凌風似欲真馳突曹霸畫馬無此精  
拂拭慘澹神氣生細觀決非近代物印押剝落無姓名  
四海只今多戰爭安得此馬一敵萬絡頭騎出千人驚  
擒戎破虜任橫行

西山湖春遊圖歌

我家掛出西山圖上有西山下西湖上堂見者怒氣麤  
問客何所怒何得生此嗔縱使撐天拄地無比倫古人

局量非今人罅間雖添兩禿松孰與遠勢開心胸  
銀山鐵壁皇陵東彷彿下走追飛龍一曲一折苦不易可憐  
片素騰雲氣落花冥冥萬壑靜白日杲杲千巖碎森沈  
不見雷霆仗照爍盡壓金銀寺回思開疆帝秉鉞燕山  
突立五鳳闕錦繡離宮巖嶮入龍驩水戲滄溟竭君不  
見輦道哀湍瀉松栢摧枯虎出沒至今守僧住湖傍瑠  
璃湧動鼉鼉忙事關體統畫合諱點綴半露還半藏伊  
昔休沐屢憇此耳邊尚夏金琳瑯上林花艷何所無東

風只恁吹西湖夾岸小杏欲爛漫騎驢紗帽西郭途同行康何咸我徒祇須十錢買尺魚旋挑土薺甘如酥朝來青暮望湖紫衣行童隨挈壺大者鼓簧小吹竽爛醉花下鳥每呼汝曹何處吾已翁十年獨看梁園紅傷心痛定忍復說回首萬事真匆匆嗚呼故舊離合誰獨無使我不悲堂上圖使我不悲堂上圖

來青軒名  
望湖亭名

### 畫竹行

鄱陵王孫稱竹溪手自栽竹堂東西已詫白晝雷雨入



遽使六月秋雲低王孫拈筆傳竹神不得乃憶能傳人  
黃筌異世與可滅本朝頗數東吳真一幅千金擲不惜  
有時客來掛之壁壁上階前翠相射風行琳琅夏摩仄  
四座慄慄生寒色陂陀沙嶼意勢遠洞庭木落瀟湘晚  
白雲悠悠去不返叢篁寂寞雙妃怨於乎畫形難畫心  
黃陵鷓鴣啼至今月不常盈日中昃人生何必長悲吟  
堂有佳賓膝有琴美酒一酌還一斟竹溪子斟竹葉歌  
竹枝醉據玉案吹參差左杯酌竹右畫師李乎孔子吾

則誰更須名手畫六逸并畫王孫逸為七

題京口人山水圖

青山逶迤如北固山下彷彿京口樹茅堂花蹊三月暮  
萋萋舊草春遊路一從畫師掃烟墨客堂日夜流江色  
江色依微帶甕城遊子歸魂逗南北

題畫搖筆成詩

去年得歸離江州七日遂登黃鶴樓南風捲江浩呼洶  
逐轟欲翻鸚鵡洲七澤莽昧不入眼孤舟屈曲襄河轉

數月已擲檀家湖夢飛每到羊公峴峴脚山南東道樓  
秦川公子醉悲秋檻邊斑竹古猶活雲石寂寞蒼梧愁  
重華馭遙不可叫白沙黑猿踈樹幽看圖彷彿曾遊處  
素壁青天漢水流

錢選畫張果圖歌

張果者中條山人也武后聞其有道術召之果遽  
死後復出往來汾晉間玄宗使李嶠齎靈書造請  
焉果至舍集賢院詔肩輿入禁中問治理神仙之

事帝悅焉欲以玉真公主妻果果不從辭還山果  
蓋剪紙驢乘之不則折收巾笥中而錢圖故落於  
俗家今為沔守李得矣

張翁紙驢真有無錢也何意傳其圖印記雖明幅斷裂  
李侯完之亦竒絕所恨圖尾錢有詩就蛇添足將無癡  
憶昔翁來集賢院入宮詔許肩輿便一日聲名人主動  
千年面目吾今見帝貌深沈玉榻雄侍人一異三人同  
漢皇信有瑤池降秦始皇枉慕蓬萊通玄言未竟鈴殿風

寸驢躍出青箱空有僮追捉雙眼紅此驢蹶躡盤當中  
李侯一看一絕倒每稱獨苦嗟良工細觀張翁骨格古  
徐福五利寧其伍曰嬪真令天下疑端歸轉覺皇心蠱  
長生殿前牛女辰廣寒仙桂舞鸞身世間但識申師巧  
誰解中條放浪人

周文靜畫雪山圖歌

周生雪山世稀見遠水近水一足練玉崖嶽崦插湖脚  
粉筆徐移掃高閣瓊枝鐵柯兩迴亞龍鱗犀甲歛參錯

林風颯颯急霰起白日冰花逐毫落天愁地慘意各出  
霧合飈回勢逾惡人言四時冬最難周生善雪仍善山  
虛堂突立萬仞壁尺素乍轉千重灣彷彿寒封洛陽道  
得無白擁藍田關袁安甘卧幾時起退之遭竄終召還  
倚山亭亭一孤松仄崖峭壑盤其中分毛聳幹一何傑  
畫者有意排嚴風君不見古來梁棟必此物願君愛之  
頻拭拂

題畫山水送人還歙

黃山沙溪杳何許圖之山水無乃是軒轅宮宰相里山  
人一出彌荆杞石林漠漠蹊徑苔霜鶴夜悲猿嘯哀紅  
顏踪跡半湖海白頭覽畫思歸來溪頭繫一船畫師本  
無意宛如倦遊者無復舟航事水雲迤邐山雲高靜定  
方知動者勞回思少日歡娛地至今夢寐猶波濤

壽兄圖歌

猗嗟我鳳生三雛二雛成立少者殂為巢抱卵兩不易  
自挺獨立身羈孤兄既躬耕濁河岸弟亦塌翅青雲途

兒長女大願各足雞肥酒熟時相呼仲氏吹篳塤者伯  
兄今六十我半百敢言意氣激墮俗要使紛紛覩標格  
大梁張路固好手湖州生絹照眼白當堂掉臂掃丹墨  
倏忽老面開生色盤松歲蕤雜花遠雲屏石几文茵輒  
靈芝底出琅玕瓶蟠桃突磊琉璃椀鶴行昂藏疑欲啄  
復綴山麋意逾宛大公烏紗微俯身中心愛弟愛復親  
次公篋服青羅巾傍兄祇順情性真壺陳爵設即未舉  
儼如酬勸言辭諄其言伊何懷二人飄風烈烈吹三秦



銜悽西望道路阻高丘莽沓狐兔隣又如自叙傷夙昔  
衰暮安寧思苦辛季冬十日兄生日今日天開皎日出  
長裾珠履座上滿剝荊椎牛酒盈室此時此圖挂之壁  
觀者嗟咨黯如失二公揖遜恰相向回看乃在畫圖上  
骨法形神各不疑輿臺緝御俱惆悵逶迤拂拭諸欲動  
展轉顧惜嗟宗匠瓶中梅菊誰致女倒映芝桃故相盪  
韡灼真回綺席春芳香解溢金罍鬯兄今健飯猶廉頗  
丹砂我煉尋黃婆復聞張生善山水買絹請掃青嵯峨

嵯峨一掃一千幅一年一幅南山歌

登天池寺歌

廬山絕頂天池寺鐵瓦為堂白石柱傳言周顛勞聖祖  
天眼尊者同顛住嶮絕下闕無底窟屈曲穿緣惟一路  
頃屬秋晴強攀陟俯之四海生雲霧岷峨纍垂西向我  
杳杳長江但東注君不見寺東崖石鐫竹林穹碑御製  
山之岑周顛胡不留至今周顛胡不留至今虎啼日暮  
愁人心

御製廬山周顛碑歌

廬山絕頂白鹿臺上有御製周顛碑石龜下蹲高結螭  
天葩震烈雲漢回文古兩漢仍過之憶昔草昧龍虎鬪  
黃旗紫蓋顛能知顛也似真還似癡帝非感悟寧用茲  
百年勢移功漸泯碑亭毀裂將及碑訶持白晝鬼神泣  
光耀天陰雷電隨先朝雖允僧奏劄修葺其如歸有司  
有司有司顛莫疑試看碑文碑後詩

遊棲賢橋歌

雷泉峽激石龍從日湍山陷回光動吁嗟此壯觀萬古  
誰為開渦黃潭黑窈莫測秀黛碧玉何崔嵬人言窟底  
有龍卧氣吐白晝常風雷去年重九登吹臺翹望名山  
思媯娜今年今日誰料吾醉踏窮山躡礪砢拂衣欲上  
萬仞壁濯纓還就孤崖坐秋風吹林猿狖語浮橋橫空  
裊相柱嵐寒細飄瀑布雪峯雲破碎芙蓉裂金枝瑤草  
真有無縹緲仙燈暮明滅君不見此橋今千年谷冷跡  
絕無人烟巖劓苔蝕石漠漠太白紫陽俱我前對此不

須更慘愴明朝且上香爐巔

懷玉山歌

懷玉之山玉為峯四面盡削金芙蓉東峯破碎瀑布落  
有潭十八龍為宅山頭草堂開者誰斬木通道余心悲  
白猿嘯雨巖竹裂石路上天風樹吹我聞龍乃變化物  
羣然卧此龍何為胡不滂沱惠下土一洗四海無旌旗

其二

君不見懷玉山山七盤盤盤上無極陰霾白日崖洞黑

隆冬雨路誰來得稻田月池山上頭半天有地今我遊  
石壇剝落古佛棄木落俯見東巖湫湫中巨魚長如人  
紅眼射日翻金鱗天台桃源在何許避秦此處吾告汝

鐵柱引

豫章古城牙城南何年鑿井置鐵柱井深江通沒不見  
時寒水涸始一露玩之非石亦非鐵孤立槎枒若枯樹  
人言旌陽鎖水母此語荒唐奚所據或云藉此壓江濤  
茲理或有誰者勞顧今伏臘盡奔走歸美真君瑤殿高

金燈翠旗日來御雕闌玉檻圍周遭俗論紛紛不須辨  
秋風日暮塵滿縣

快閣引

四月月圓登快閣天半晚牕雷雨入邑中上客攜酒至  
歐陽羅子咸來集去年為閣初築臺我時登之雷雨來  
神明似有兩歲約晴霧歛值千山開千山迴轉江中流  
徙倚闌干增暮愁夕日下看衡嶽破波濤左顧匡廬浮  
苦思昨年生盜賊大江南接江之北烽火遙連海岱紅

殺雲眼見鄱陽黑斯邑洶洶今始安我今對酒能不寬  
諸君稍減般移苦百姓新回種植歡北風江湧月東來  
更說夙昔俱停杯陰晴倉卒不自料萬事恍惚誰能猜  
潢池暫殄干戈釁向隅猶抱瘡痍哀勸君置此勿復道  
放歌且與雲徘徊

九江陸還南康望東林

匡廬山北東林寺前年八月遊曾至只今馬出蓮峯道  
西望東林但縹緲風吹榭櫟猿晝啼卻憶石門臨虎溪



舊聽石瀨猶在耳雷燒碑樹今應死

觀水簾泉歌

水簾瀑布人罕至三級背懸五老峯  
礪石嵯岬路險澀深窟風草吟蛇龍  
自從開闢藏難見可憐彼瀑蒙稱羨  
走勢天晴萬古雷流光壑暝常留電  
亂峯雲走白日微翫罷催君及早歸  
鬼神忌才亦好靜恐有驟雨霑裳衣

結腸篇

李子曰結腸之事蓋予妻亡而有此異云  
奠妻以

牲烹腸焉腸自毬結李子異焉曰胡為烹胡為結  
恍惚神怪孰主孰使厥理孰測怨邪德邪生有所  
難明死託以暴衷邪嗚呼嗚呼作結腸篇焚妻柩  
前妻固識文大義或亦契其冥懷也

哀者且停聲弔客坐在堂聽我結腸篇曲短哀情長五  
月廿七吾妻亡厥明奠之羅酒漿其牲伊何殯與羊痛  
哉釜鬻結殯腸神靈恍惚心駭傷團圞肉毬出中湯左  
迴右盤準流黃經緯纏糾文陰陽底形井字圈兩旁翼

翼彷彿雙鳳凰有綏在下累而長上有提襟五寸強汝  
乎無意豈為此呼汝欲問魂茫茫十呼不應百轉咽腸  
乎腸乎為疇結

其二

結腸結腸忍更聞妾年十六初侍君父也早逝母獨存  
為君生子今有孫昔走楚越邁燕秦萬里君寧恤婦人  
外好不補中苦辛中年得歸計永久命也百病攢妾身  
言畢意違時反脣妾匪無迂君多嗔中腸詰曲難為辭

生既難明死詎知千結萬結為君爾君不妾知腸在此

其三

結腸三闋聲更咽汝腸難解我腸結夙昔失意共奔走  
汝實千辛我蹉跎官歸家定今稍寧豈汝沈繇遽離絕  
魂乎魂乎遊何方兒號女哭週汝旁劇心飲泣看彼蒼  
愚者何壽慧何亡佇立逶迤若有望迫而卽之獨空牀  
梁間二燕哺子急觸落青蟲污我裳錦衾塵埃委鴛鴦  
總帷中夜風琅琅魂驚夢搖中慘傷陰雨啾唧燈無光

嗚呼此曲不可竟為君賡歌妾薄命

哀才公

正德己巳年作此公嘗薦余故有國士之感

仲冬東南天鼓鳴我軍滅胡功可成道之將行歲在己  
星落轅門悲孔明尚書頭顱血洗箭馬革纏屍亦堪羨  
夷門野夫國士流痛哭天遙夜雷電

是月雷  
電屢作

哭新縣

是時新設萬年縣新民反覆殺副使李情靈寶人

也

苦死可憐靈寶子有官十數同時死四路蕭蕭人斷行  
一軍盡驚牀夜徙新民反覆誰不知性實虎豹佯螻蟻  
白金綵段縱寬汝朝廷有問將何以

觀燈行

詳見夢  
華錄

宋家累葉全盛帝寬大實皆稱令主百姓牛馬徧阡陌  
太倉米粟憂紅腐宣和以來遂多事嗚呼爛費如沙土  
海石江花湧國門離宮別殿誰能數羣臣諛佞祇自計

天下騷然始怨苦正月十四十五間有敕大駕觀鰲山  
萬金為一燈萬燈為一山用盡工匠力不破君王顏此  
時上御宣德門樂動簾開見至尊奔星忽經於御榻明  
月初上堆金盆傾城呼噪聲動地可憐今夜鰲山戲窈  
冥幻巧百怪聚金蛾翠管堪垂淚借問幸臣誰云是李  
師師外有蔡京與蔡攸夾樓錦幄羅公侯丞相之幄當  
前頭奚兒腰帶控紫騮如花少女擎綵毬但聞樓上喚  
樓下黃帕籠盤賜玉羞月高鳴鞭至尊起幄中環珮如

流水爭道齊驅輦路窄寺橋窈窕塵埃白火樹龍燈又  
一時千光萬焰天為赤常言宴安成禍基從來樂極還  
生悲君看二帝蒙塵日數月東京荒蒺藜

石將軍戰場歌

清風店南逢父老告我己巳年間事店北猶存古戰場  
遺鏃尚帶勤王字憶昔蒙塵實慘怛反覆勢如風雨至  
紫荆關頭晝吹角殺氣軍聲滿幽朔胡兒飲馬彰義門  
烽火夜照燕山雲內有于尚書外有石將軍石家官軍



若雷電天清野曠來酣戰朝廷旣失紫荆關吾民豈保

清風店牽爺負子無處逃哭聲震天風怒號兒女牀頭

伏鼓角野人屋上看旌旄將軍此時挺戈出殺胡不異

草與蒿追北歸來血洗刀白日不動蒼天高萬里風塵

一劔掃父子英雄古來少天生李晟為社稷周之方叔

今元老單于痛哭倒馬關羯奴半死飛狐道處處驩聲

噪鼓旗家家牛酒犒王師休誇漢室嫖姚將豈說唐朝

郭子儀沈吟此事六十春此地經過淚滿巾黃雲落日

古骨白沙礫慘淡愁行人行人來折戰場柳下馬坐望  
居庸口却憶千官迎駕初千乘萬騎下皇都乾坤得見  
中興主日月重開再造圖梟雄不數雲臺士楊石齊名  
天下無嗚呼楊石今已無安得再生此輩西備胡

玄明宮行

今冬有人自京至向我道說玄明宮木土侈麗誰辦此  
乃今遺臭京城東割奪面勢創截業出入日月開帡幪  
矯託敢與天子競立觀忍將雙闕同前斫石柱雙蟠龍

飛梁透迤三彩虹寶構合沓殿其後儼如山嶽翔天中  
金銀為堂玉布地千門萬戶森相通光景閃爍倏忽異  
雲烟鬼怪芘杳濛以東金榜祠更多樹之松檟雙梧桐  
溟池島嶼鯁鯉躍孔雀翡翠兼羆熊那知勢極有消歇  
前日虎豹今沙蟲牕扉自開衛不守人時遊玩搖玲瓏  
陞隅龍獸折其角近有盜換香爐銅青苔生泥鏡面鎖  
野鴿哺子雕花櫳憶昔此閣握乾柄帝推赤心閣罔忠  
威刑霹靂縉紳毒自尊奴僕侯與公變更累朝意叵測

培克四海真困窮長安奪第塞巷陌心復艷此閹何蒙  
構結擬絕天下巧搜剔遂盡輸倖工神廠擇木內苑竭  
官阮選石西山空夷墳伐屋白日黑揮汗如雨斤成風  
轉身唾罵閹得知退朝督勞何匆匆人心嗟怨入骨髓  
鬼也孰復安高崇峩碑照耀頌何事或有送男充道童  
聞言愴惻黯無答私痛聖祖開疆功渠干威福開者誰  
法典雖嚴奈怙終錦衣玉食已叨竊琳宮寶宇將安雄  
何宮不鐫護敕碑來者但看玄明宮

康郎山歌

君不見康郎山屹立東湖中  
波濤撼蝕山脚塌破廟枯  
木常烈風芒碭草昧赤帝出  
揮劍遂使凡蛇空卧榻之  
外事亦小萬方有罪惟朕躬  
美姬寶玉歸御幄浮屍蔽  
江江水紅發踪劉陶固其力  
死戰難言非數公秦人枉  
哭嶠函瘞漢祖輕酬垓下功  
至今有廟此山側天陰雨  
濕時見朱旗白馬光如虹

乾陵歌

武后陵黃巢伐之  
事具雪航膚見

九重之城雙闕峙前有無字碑突兀雲霄裏相傳翁仲  
化作精黃昏下山人不行蹂人田禾食牛豕強弩射之  
妖亦死至今剝落臨道旁大者虎馬小者羊問此誰者  
陵石立山崔嵬銅鐵錮重泉銀海中縈迴巢也信力何  
由開君不見金棺玉匣出人世薔薇冷面飛塵埃百年  
枯骨且不保婦人立身何草草

空同集卷二十二

欽定四庫全書薈要卷一萬六千九百十四

集部

空同集卷二十三

明 李夢陽 撰

五言律一

郊觀齋居東邊喬二太常

人日過仙院春霞縹緲分碧回瑤澤草紅綻藥宮雲獨處依松樹清齋對鶴羣桃源知並入惆悵不逢君

郊壇值雪

鳳輦連宵發，鷄鳴雪滿畿。  
嚴隨黃鉞至，清繞翠華飛。  
伏謁深沾珮，朝回半濕衣。  
懸知清切地，沖默迓天威。

西天門候祀

瑤壇暮雪盡，月出禁門西。  
地靜鳴珂碎，沙寒簇仗低。  
臺官移斗柄，衛士掃雲梯。  
遙識龍文氣，爭傳法駕齊。

恭陪郊祀紀成

御氣三更合，君王在闕宮。  
燎煙凝碧落，墀月起微風。  
上帝居歆夕，文王陟降中。  
諸壇嚴從幕，元祀報成功。  
侑食



珪璋潔登歌玉磬同神旋仍醉飽萬舞向春空

郊祀以病不與

端月溫風至圓丘瑞霧多開壇洽百禮伏枕想登歌日  
月春旂閃雷霆晝輦過年年覲上帝只為乞民和

卧病酬邊君天壇步月見懷之作

霽夕開芳甸祠宮悵獨遊銀潢橫殿落壁月抱壇流漢  
時饒煙霧秦城逼斗牛甘泉詞調絕疲病若為酬

大行皇帝挽詩

弘治十八年五月

午門朝遂罷西殿臨真哀淚滿乾坤暮日黃風雨來虎  
賁猶宿衛龍馭幾時迴莫測皇天意中崩帝業摧

其二

大訓文華踐英謀武範遺先朝無顧命大漸問班師上  
食金輿備移宮素幔垂向來激切疏優渥小臣知

其三

元老炯仍在退朝無昔呼閒階惟玉輅夕日已金鋪望  
幸霓旌遠埋靈山殿孤君看霜露節冠冕灞陵趨

候輓

冬月初圓夕含悲候輦東閣門猶警蹕松栢已新宮象  
衛悲風入龍旂白霧中有髯渾欲挽雲墮鼎湖弓

望泰陵

昔臨園西內悲風入紫冥今來松柏望斜日泰陵青殿  
起雲煙入龍遊劔壘局萬國今多難孤臣涕倍零

謁孔廟

端笏陪朝列時禋謁聖林戟門留石鼓春殿靜珠琴

府星連切壁池龍躍深  
洗洗趨國子早晚翠華臨

益王頌

憲宗王十子益府實稱賢  
體統朝廷半敦崇德業全書  
堂斜晝日琴殿淨秋煙  
問寢還英嗣時研世子篇

壇祀酒會

齋居新宴合桂裏戟門開  
鴈赴龍旌到蛩喧羯鼓催  
松筠分曙色劔珮接行杯  
日上雲霞散驂驛羽騎迴

驪山

繡嶺花仍繡湯泉滿故宮禁池人自浴新月古應同玉  
殿興亡後青山涕淚中千巖歌吹入猶想翠華東

橋山

青宮棲古岑白露靜松林忽下烏號淚遙悲龍去深衣  
冠萬國後轍跡四方心一氣流羣帝哀哉笙鳳音

瓠子

沈璧餘瓠子橫汾懷帝歌波濤滿眼送城郭没年多虎  
戰仍三晉龍遊失九河宋人饒事蹟今望亦滂沱

朱仙鎮

水店回岡抱春湍滾白沙戰場猶傍柳遺廟只棲鴉萬  
古關河淚孤村日暮笳向來戎馬志辛苦為中華

朱仙鎮廟

宋墓莽岑寂岳宮今在茲風霜留擗拍陰雨見旌旗百  
戰回戈地中原左衽時土人嚴伏臘偏護向南枝

峴山

大名終不滅墮淚此山碑後進才非乏風流爾足師古

堂陰漢水新路改城池回首隆中接秋雲兩處垂

鹿門山

龐公真漢隴孟子復唐詩舊宅新秋葉孤墳千載遺泉  
裊石穴細葛倚松門垂望望青峰近吾襟曠爾期

冬日仁和門外

箋云門在大梁

寂寞何王殿遺墳此徑孤玉階番雪草野日自金鋪廡  
暝牛羊聚林風鳥雀呼白頭香火者猶護赤龍符

其二

二塚累累接聊城復定安

二世王絕

情哀宮獨盛世異柏同

殘久雨石門塌新霜帷殿寒西陵時節望誰見綺羅歎

令婆墳

國初掄秀嫗分遣入周宮但覩丘墳鬱寧知乳哺同後  
王忘昔日頽屋鎖春風寒食鶯啼切林花落自紅

始謁徐祠

予問何不用木主守者曰有像則人起敬

廟古傍湖偏春行更可憐楚城芳草徧紅日此堂懸榻  
想陳公後時悲孝獻前亦知遺像誤瞻拜淚油然



徐墓書張相國碑銘

不讀南州傳誰知高士心  
江城遺塚在春日古祠深  
竹鳥嚶嚶合松牆靡靡陰  
曲江千載碣書罷淚盈襟

陳祠在徐墓東

可訝司徒廟偏隣孺子墳  
哲人堪一哭漢鼎竟三分  
門引江畔草榻留松上雲  
紛紛車馬客誰此薦清芬

韓文公祠

袁州山在城韓廟倚山清  
冕服前朝貌文章百代名  
石

苔猶馬路春竹自鶯聲立望潮陽近翻翻海氣征

武陽郡公祠

惠愛前人蹟追思後代心洪都觀察廟香火古江潯白  
日江上過青松霜露深亦知精爽異應厭鼓鼙音

徐蘇二祠

孺子真高特雲卿岨後先揮鋤傲漢冕捆屨卧江烟寧  
飫糟糠畢恥同貪濁全淒涼百代守悵望一潸然

鵝湖書院

書院佛堂邊，頽垣嶺谷連。  
四時僧灑掃，千古儼高賢。  
立壁東萊毅，懸河子靜偏。  
衆流終一海，流淚考亭前。

九日黃花鎮

黃花遇九日，風雨不逢花。  
水湧石梁斷，溪吞山郭斜。  
將軍午宴客，欲醉忽聞笳。  
困苦墩樓卒，經年誰見家。

九日應變齋居

時變逢搖落，齋心對暮天。  
未擒可汗日，新起泰陵年。  
聽鴈真無那，看花益泫然。  
將歸思臨水，愁絕宋生篇。

九日慈恩寺閣

寶地元依海珠林更假山登臨重九遇城闕五雲還歌  
吹喧侯里邊烽入漢關望鄉歸未得能對菊花斑

其二

敕寺四圍湖秋林層閣孤天空木更響風落帽還扶魚  
羣梁下躍鳥影鏡中趨泛菊看山海寒烟暮有無

生日寫懷

臘日明朝是浮生此歲過黃雲薄暮積白髮向來多壯

士看雄劍幽人戀薜蘿異時論出處竊慮各蹉跎

十二月十日

今日吾兄壽蕭條自舉觴燕山非故里汴水亦他鄉  
河鯉行思海原鴿飛畏霜客居憐小姪潛望白雲長

臘日退朝口號

霽色催寒臘雞聲下紫宸至尊深抱戚粥食罷嘗新  
宮霧戎戎薄城鴉款款馴小臣憐歲序翹首待陽春

七月十五日食不見追往有歎

月食今年再中元與上元春晴燈火亂秋暝雨雲繁漢  
將高城壘胡塵滿塞垣孤臣萬古淚偏灑秦陵園

月食

有明終不減暫掩亦何虧萬國喧呼地三更鼓角悲輪  
生挂與發光復兔還隨顯晦每如此人生祇自疑

元日汴上雪霽

旭日薰江檻晴雲麗竹扉簷花雪色靜庭篠碧滋歸歲  
月高兒女行藏老蕨薇眼看人共醉椒酒不堪揮

清風河上寓樓獨酌

一自違京邑飄飄歎此遊  
桃花是往歲竹葉轉新愁  
暮雨津城樹春帆水國樓  
汴河隄上柳烟色似皇州

庚午除日

于今將四十始悟昔年非  
白髮誰能那紅顏我漸違  
行藏沙上鳥日月故山薇  
悵望勞歌起風河柳色歸

辛未元日

萬事渾如昨蹉跎四十臨  
取塗傷老馬聞道愧前禽  
日

變風雲氣春生海嶽陰  
趁時聊物賞此外更何心

中秋南康

同是中秋月匡廬只自看  
故臨石鏡上偏傍落星灘  
北望關山隔南飛烏鵲寒  
鳳歌喧太液光憶滿長安

廬山九日

廬山隨晚坐江漢淨秋襟  
九日黃花雨書堂紅葉深  
細雲飄古帙寒兕吼空林  
不用風吹帽尊前有靜琴

上元滕閣登宴



滕閣上元宜章江登宴時衣冠還大國唐宋自殘碑燈  
火闌堪凭風塵淚欲垂黃雲驅日暮回首見征旗

其二

陽浦通新霧陰城帶古樓君王罷歌舞棟宇白雲留草  
色歲年換客心江水流暮昏仍一望燈火萬家州

九日薛樓會集

不倦登樓目遙憐秋色重楓村疊暗浦霜日抱孤峰楚  
越窓中地江山戰後容倚闌渾不語吾欲採芙蓉

其二

恰送重陽目能禁孤鴈來林稀山盡出風順櫓齊開  
況是薛樓會難孤江上杯菊芳看莫厭秋色異鄉催

清明曲江亭閣

寒食花爭麗豐江柳獨深此行元慷慨落日更登臨  
浩蕩五湖際風烟千里陰坐看舟楫急徒切濟川心

端午贛州晚發

戲倦龍舟返吾驅彩鷁行晚天開古驛轉眼過孤城  
媚

娟雲生瀨悠悠弟憶兄  
泛蒲雖念我寧解嶺邊情

南康除夕

畏途值除夕會我得投閒  
海雪寒城古江春碧草還  
星河掛嶽樹燈燭熨歸顏  
竊計臨家日薔薇滿舊山

南康元夕

四海逢今夕孤城有獨身  
干戈猶野哭梅柳自江春  
月向平湖滿鐙於靜夜親  
罷誼風乍起嗟爾楚南人

其二

嘈嘈市鼓動松月靜吾門燈火思今夜風光滿故園天  
明淹舞袖塵暗失游軒老鬢江山異愁看旌旆繁

元夕風起南康

嶽雲黃裊裊夜半忽淒風度市春燈亂穿梅野樹空人  
依青岸酌月漾碧湖中擬盡江城賞無欺蠟炬紅

乙亥立秋

今日秋風起連年濕病蘇應時微雨歇侵曉斷雲徂已  
復寒蟬集空嗟蕙草孤步檐驚驟健一葉下庭梧

中秋

漢江江上月今夕去年看尚憶峴山曲  
秋城波色寒故鄉仍節序衰鬢且儒冠  
桂子真誰種天空落未乾

其二

輝輝衆星沒宛宛孤輪高萬古今宵月  
青天首自搔度閨螢息照懸樹鳥分毛  
寂寞枚乘筆空懷八月濤

戊寅元夕

春色閨冬後元宵驚蟄邊軟塵欺月散  
繁火奪星懸車

馬中原地笙歌全盛年無勞驗花燼難測是皇天

中秋喜客攜酒見訪

節有吾家會天能此夜陰蟾蜍逐月沒桂子落雲深同  
是悲秋客況懷天柱心引盃光欲閃徙倚向東林

其二

雲出真誰料月行應自如闇然花徑裏忽枉故人車落  
葉近坐滿清光中夜舒杯來不須却此意合躊躇

十月月食不見

頻食天應苦當宵地故陰悲生十月雨狂阻萬方心武  
解香燈聚霜林鼓角沈復光何處滿願逐翠華臨

巳卯元夕

此夜門還閉中天月自看春催桂應發雪映兔猶寒兒  
女添鐙鬧鄰家品笛殘少時思可笑走馬向更闌

庚辰清明東郭

少日歡游處逢春老大悲強持盃酒勸怕遣落花隨草  
木梁園在山河宋殿移上墳人盡返岐路獨含思

九日上方寺

賞時爭上塔乘月復登臺地盡中原入天空秋色來望  
鄉番恨鴈有菊且銜杯却憶龍山帽徒增醉者哀

其二

天地疎秋色樓臺啟客歌遠江寒自白落木晚堪多月  
為銜杯出鴻於鳴磬過霜橫不歸去吾意在烟蘿

至日夜雪

至後還深雪幽心獨小堂光雖奪片月寒恐妬微陽壓



竹寧迷翠沾梅祗辨香一聲何處鴈翅濕且高翔

癸未中秋不月

碧桂行青鳳嬋娟集玉樓世人寧解覩天意漫陰秋雲  
逼初光布星隨滿夜收開晴即是月但遣一尊留

乙酉上元上方寺

地愛僧林僻人邀燈節游緣媿朝借馬改路晚登舟春  
水見鷺滿夕陽鐘磬幽相留待明月簫鼓在中流

丁亥立秋

火多常病熱殘暑特相欺今日涼風至颯然林竹披聞  
雞每起早省稼獨歸遲天地蕭條意何須一葉知

中秋亭會

老去真耽月更深且醉遊影沾如畏露光冷是分秋蛩  
故吟清酒蟾應笑白頭恒星藏不見坐待彩波流

戊子元夕 示曹甥

皎月臨元夜和風入始春過冬猶望雪思世轉愁人歌  
館喧鳴鼓遊車匝暗塵黑頭宜努力吾鬢已如銀

巳丑五日

往歲沾宮扇含香拜玉墀  
只今飄白髮刈麥向東菑  
樹鳴蜩日家家望雨時  
萬方多難意誰達聖明知

五日莊上集

園柱日佳色黃鸝時巧音  
美人翩紫馬攜酒入花陰  
艾席鋪能坐蒲觴乾自斟  
蜩鳴雖頗聒流轉是天心

明遠樓春望

貢院初開閣春陰獨倚欄  
柳邊千艦聚花裏萬家殘  
風

雨江聲壯兵戈地色寒  
斷腸沙鴈北羣起向長安

宜春臺春望

古州圖記見今望臨高臺  
人倚楚天盡風驅湘色來  
密雲生曉暝遠水上春雷  
尚有干戈淚馮軒眼倦開

謝巖秋日始集

百戰江山在吾來草木秋  
孤城洞口落襄水席邊流去  
國雙王祭題巖只謝侯  
醉歸憶山簡飛興習池頭

秋望

蝶戲猶餘蘂，蟬吟已怯枝。乾坤入漢日，霜露望鄉時。屈子偏生楚，王通不負隋。晚楓江更苦，莫上峴山祠。

古城春望

陰陰日欲暮，迢迢春望稀。野色吹寒立，林鴉逆雨歸。孤城還麥秀，白首且花飛。臨路長楊嬾，前朝今是非。

東陂秋汎三首

久說東陂好，今陪上客遊。綺筵開畫舫，哀笛奮中流。舞每低輕燕，歌先起白鷗。稍前休更進，吾愛荻花洲。

其二

水寺通人少松亭隔芰荷問僧舟暫艤登岸酒同過草  
木秋風入湖山晚色和返撓須痛飲前路滿漁歌

其三

進艇晨烟碧回撓晚日黃宿禽喧亂葦饑獺竄空梁放  
浪形骸得牽纏世路忙要君待明月此水是滄浪

春晴野寺和李大

野濶愛春幽新晴覓寺遊立僧當徑望融雪向門流淨

色悲諸界浮生晒一丘  
憐君厭囂俗行處即滄洲

城南夏望和王相國

散步郊南望雛鴉款款飛  
園林惟草色時序已絺衣  
試粉蓮初膩殘香棟乍稀  
亦思河朔飲無奈賞心違

春日臺寺

寺僻春還麗人閑午任遊行  
隨碧草遠話為老僧留池  
竹晴常潤龕花晚更幽  
塔端兩巢鶴怪爾亦優游

春日漫成

豪真欺酒綠老每厭花紅人事年年異春風物物同雲  
霄猶旅鴈時序又新菘潦倒元吾分金尊莫放空

春宴

物與吾何異春隨地不同游歌盡墨客亭榭半花風身  
世一杯外山河雙眼中無言時未夏已報石榴紅

其二

老為春憐酒閒將客問花檻揚晴故雪堦藥晚能霞地  
與歌鶯轉人爭舞燕斜但來須共醉莫使負韶華



疊前韻二首

昨與君游處今來訝不同  
早荷浮嫩水夏樹起初風  
人醉孤亭上禽鳴萬竹中  
興深天亦助斜日片雲紅

其二

舊徑添雙樹新叢試一花  
春風逗笑語落日變雲霞  
圃色隨人遠樓陰趁酒斜  
誰知在塵境遽爾隔紛華

丙戌中秋名客賞之以雨多不至者


隔年期月易一夕借光難  
秉燭筵非改登樓客不懽  
竹

風秋聽力松雨夜留寒天柱峰頭色應還似畫看

丙戌十六夜月

是夕微雲中天遂朗因憶往時京華賦詩有清虧  
桂闕一分影寒落江門幾尺潮之句人多傳誦彼  
吾少俊今遽老醜并前詩忘之矣亦以集未收載  
月豈無晴夜天終有散雲微微透今夕朗朗至宵分鏡  
展池波暈珠明草露文呼兒暖餘酒酌罷一鴻聞

空同集卷二十三



總校官庶吉士臣侍朝

校對官編修臣閔惇大

謄錄舉人臣嚴儀

謄錄監生臣吳錫綵